

11 MAY 2000

KEDIAMAN MENTERI BESAR PERLIS JADI TUMPUAN PEMINAT POLITIK

KANGAR, 11 Mei (Bernama) -- Meskipun dua stesen televisyen menyiarkan secara langsung majlis perasmian perhimpunan agung Umno ke-54 namun ia tidak menghalang orang ramai daripada mengunjung Dewan Residensi di sini untuk mendengar amanat Presiden parti Datuk Seri Dr Mahathir Mohamad.

Dewan yang terletak di pekarangan kediaman rasmi Menteri Besar Perlis Datuk Seri Shahidan Kassim itu menjadi tumpuan orang ramai sejak pukul 8.30 pagi berikutan kemudahan siaran langsung yang disediakan di situ.

Jumlah kehadiran hari ini adalah lebih besar berbanding semalam.

Antara yang hadir ialah Setiausaha Kerajaan Negeri Perlis, Abdul Latib Omar dan ketua-ketua jabatan.

Selain berpeluang mengikuti perhimpunan agung itu melalui layar besar dengan selesa, mereka juga disajikan dengan makan tengah hari.

"Kami bagaikan berada dalam dewan perhimpunan apabila berada di sini," kata Ridzuan Ali, 38, seorang peminat politik.

-- BERNAMA

AD AKD